

四庫全書

史部

欽定四庫全書

史部

辛魯盛典卷二十三
至六

詳校官宗人府府丞臣寶光

編修臣程嘉謨覆勘

總校官進士臣繆珙

校對官助教臣胡予襄

謄錄監生臣翟灝

欽定四庫全書

幸魯盛典卷二十三

聖駕幸魯恭紀一首

經筵講官起居注翰林院掌院學士兼禮部侍郎督學士_臣李光地

燔柴升岱嶽舍菜戾宗祊獻愷方於泮升中告

厥成巾車陳

法駕大馭倣行旌望望采風意遲遲問俗程徒遵時

邁迹那有登封名嶽瀆公侯貴山河帶礪盟懷

柔均載德設險竟銷兵目擊波臣順深懷禹績
宏遂臨牛女次還稅虎龍城禮致鍾陵重心忘
磬折輕朔風吹返旆白露湛寒英訪道思方切
崇儒意獨誠宅仍生所里堂儼夢時楹入廟中
芹薦隆賢肅鼎烹師存則禮拜

帝用作歌聲沂統休公旦嗣音喟孟鄉豐碑齊屹立巨
榜繼高擎先後被明典存亡感至精恭惟

天子學實共聖賢并枯植紆

皇豫泉源啓

睿情人如根不朽天與水俱行微義昭雲漢貞珉列瑰
瓊章懸萬象仰貺動百神迎匪獨斯文煥時當

大道亨

聖駕幸魯恭紀二十韻

都察院協理院事左副都御史臣鄭重

魚海發弓日龜山植壁年雲旗千仗出

行殿八風宣肆觀來虞牧封泥陋漢編明堂開左个

洙水溯長川景運文昌耀儒宗

帝德全宮牆瞻數仞俎豆接羣賢警蹕

鑾輿降威儀

玉步虔百王尊莫尚九頓禮無前魯殿施

宸幄奎文肅講筵翼經雙夾轂闢異獨乘權撫檜文仍
在披圖貌儼然何來雲煥棟知是筆如椽鄒魯
連山近顏曾列坐先景行光後裔

欽命永承乾大野初回輅深宮更麗篇碑當霄漢上氣

入斗牛邊聖嗣開弘館羣才彙廣淵臣鄰叨侍
從詞賦邁甘泉統向中天接文從墜地傳

作君師亦備王道頌平平

聖駕幸魯恭頌二十韻

巡撫河南都察院右副都御史臣王日藻

虞后時巡日周王于邁年聲靈彌宇宙文教訖
垓埏迺

命崆峒駕言探洙泗淵山河齊十二禮樂魯三千問俗

情常切崇儒志更虔
式閭弭絳節入室撫朱絃
髣髴儀型邁依稀響籟連

宸衷虛受廣道岸誕登先
真已窺堂奧寧惟飭豆籩
捫碑頻徙倚

駐蹕自纏綿檜老摩挲久
槐疎芟憩便攀條思手植
懷古契心傳典秩攸隆矣
褒嘉孔亟焉

天章揮楔額

御墨灑雲烟

賜出瑤函麗懸來鐵畫妍
尼峯增氣象壁水益澄鮮
師表千秋重威儀萬祀沿
微臣留汴洛職守在

旬宣載述

東巡禮欲賜

南幸篇欣瞻

五輅近賡拜

六龍前

皇上臨幸闕里恭紀

巡撫山東都察院右副都御史臣張鵬

發軔乘農隙觀風動

帝咨受釐登岱後乘錄渡河時連舳旋吳榜鳴葭拂魯

颶

六飛臻闕里羣祀首

宣尼宅即恭王舊都仍少昊遺彤雲大庭庫壁玉璫

宮池五父衢猶昔千官仗屢移到門紆

玉趾清蹕展綬帷古檜晴捎閣香雲畫滿墀駿奔鷁結

侶羽葆鳳銜旌廣樂三終曲鴻臚九拜儀酒甘
周秬卣俎實漢鷄彝釋奠加殊禮升階重繹思
肇窠芝榜字晨露杏壇詩肅肅懸車在亭亭

御蓋垂講堂陳几席書壁靜金絲大學探精義乾行
闡繫辭治平原有街道德本無歧俞騎郊垞外
前旌洙泗渚流波橋宛轉宰木徑逶迤璜瘞封
中土檀交冢上枝淺溝希伏兔勁草識苞著駐

罕邀

宸顧承

恩拓兆基柞粉彌鬱鬱羊虎任累累更下蠲租

詔均沾濺澤施尊儒情允洽咸秩典攸宜復

勅容臺議重新文憲祠洪支頌世祿博士補經師紀事

增僉載連篇集庶司回

鑒敷

睿藻伐石輦豐碑守土微臣忝周廬禁馬隨射曾觀嬰

相履幸拭鍾離棟宇誠先務經營敢後期姬公

庭孔碩孟子廟兼治丹雘舒民力青霄答

主知褒崇逢盛際汗簡著隆規

皇帝臨幸闕里恭紀律二十韻

太常

寺

卿

臣

胡昇猷

鉅典邦之重時巡世所崇陽回先照乘

駕動早呼嵩春入行幃曉雲隨玉趾東他山總培塿喬

嶽自穹隆疊巘鸞旂轉遙天海日紅獨臨千仞

上高瞻九霄中旋鼓江淮棹還詔河濟工川原

敷

睿藻草木被和風歷覽周民瘼迴有望魯宮冠裳咸肅
穆俎豆倍豐融雅志追遺鐸虛懷屈

聖躬登堂鳴石簾入室撫絲桐鳳德歌如昨麟書道未
窮君師萬古合先後一源通碑勒成蝌蚪詩成
落蠅螭橫經詮妙旨講義愜

宸衷人拜簪纓美家承雨露洪從知敦禮樂絕勝訪崆
峒洙泗心傳契要荒文治同赫然聲教訖百代

啓顙蒙

扈從

聖駕幸闕里祀

先師恭紀

光

祿

寺

御

臣

閻興邦

羽林仙仗擁橋門萬姓呼嵩識

至尊洙水儒宗流有派杏壇經術語歸根

臨軒自昔求賢切

降輦須知為道存曲蓋千秋逢異數長教祀典並乾

坤

聖駕幸魯恭紀二律

都察院協理院事左僉都御史

臣

徐誥武

藹藹千官擁

至尊雖雖

玉輅發端門右文

聖德惟天授

幸魯虛懷為道存香繞八鸞浮瑞靄霞連三觀湧朝暎
駿奔終事逾嚴肅肸蠭遙通靜不喧

其二

宮牆數仞望森森

鳳輦遙過意自深

至德後先同作聖

執中今古獨傳心一時芹藻披甘雨四壁金絲起

玉音俯仰遺徽真儼在杏壇風日細泉吟

聖駕東巡幸闕里頌有序

日講官起居注詹事府詹事兼翰林院侍講學士_臣歸允肅

稽古帝王拓迹建統宅中圖大奉天地之紀協
神人之靈湛恩鴻龐禔福中外厥有亘古未耀
之典大道積而逾光鴻儀鬱其有待擴然一振
舉之以扶持人心震動耳目真覺世之標準君
師之極軌也哉

皇上下武基命紹文開績德威遐暢覃及四表凡孽臣

違拒么麼保聚背恩干紀者皆相繼剪除窮山
阻海負險介恃之衆無不弭首帖服歸命恐後
至仁洋溢潤漑穹壤燭龍若木之鄉條支織皮
之旅皆重九譯而獻圖王會而至跂行喙息懽
豫順動域內太和園草之風滋康衢之謠作
天子猶穆然興思邨邨乎憂蒸生之未遂求所以加惠
乎窮簷爰

命禮官修舊章遵時巡肆覲之制

渙汗德音肆赦蠲責問民疾苦

賜所過田租燔柴岱宗黜七十二君矯誣之陋歷視
江淮慰億兆民其咨之願

警蹕輟嚴徒御不飾所至夾道扶老攜幼歡聲雷殷
戒侈靡之習俗獎廉善之吏治明試以功車服
以庸以至夏社殷墟並令飭治霑

曠澤焉雷雨之施溥矣灌溉之利博矣爾迺屬車清塵

迴

鑒魯郊遂繫尼山升闕里之堂下拜登獻肇舉備禮
歷觀車服禮器周旋庭廡俛仰墟墓慨然曰淵
哉邈乎千聖之道衍百王之治法畢萃於茲
予一人敢不加虔遂進四氏學徒執經講藝諮悉同異
稱制臨決如永平故事仙葩九旂曲莖承芝留
貯予闕庭為萬代景仰

親灑宸翰輝禁額金薤玉書炳耀琳瑯回雲漢之章宣
圖書之藴揚挖風徽潤飾道輿龍文琬琰光於

不朽復蠲賦贍田培護松楸遂其繁行諸在引
擢之列者令早試民社各展其所學賚予優洽
獎勸諄至煌煌哉崇儒之

鉅典振古爍今矣昔漢高過魯太牢致祀侈為四百
年王業唐宋之君躬奠再拜親製像贊並事嫺
一時況乎擷道德之要闡洙泗之精表章

至聖如此其隆重者哉若夫褒姬公之裔聿崇廟貌
烝嘗世守榱桷几筵觀聽一新是又所以隆配

天之絕業報制作之成功發皇幽渺亘千禩而
未有聞者也微臣職在珥筆不揆固陋稍攄萬
一雖不足以颺

熙朝之盛事耀孔壁之文彩使微眇姓氏得附
大典之末實不世之榮遇也敬作頌曰

蕩蕩由庚底民之生誕作聖兮式我

皇度聿往求寧日躋敬兮戕戕岱宗以表魯邦靈所鍾
兮揚揚龍旂

親展盛儀道則充兮我

皇于邁拊循萬方哀時對兮拜奠泮雖令德善教秩有位兮日星麗天斯文後先丕光顯兮布護衍溢錫之球璧彰懋典兮龜蒙肇祀聿秉周禮芬膋夢兮大澤之博暨江及淮胥滂霈兮軌躅所至莫不埏埴福攸同兮

聖駕臨幸闕里恭頌二十韻有序

日講官起居注詹事府少詹事兼翰林院侍講學士

臣

翁叔元

臣聞麟紱玉書之瑞德毓水精龍文金檢之符
道高山嶽魯都遺殿繡柱雲楣泗上靈祠朱櫓
碧瓦漢元帝褒成之詔邑八百家宋太祖展享
之文門十六戟雕簋玉豆自古攸崇竹管匏笙
於今為烈我

皇上通乾象之靈協坤輿之德誕膺

景命際會昌期七政既調羅九賓之玉帛百神允洽舞
六代之咸韶埋蒼璧以告成功肅碧壇而虔薦

祀於時詳徵月令博採明堂用循甲子之期

翠輿東狩方值仲冬之月玉琯南浮駐

萬乘之旌門裁九華之

帳殿爰修鉅鬯是致苾苾五衢入不壞之宮光餘丹
甕兩觀撫重生之檜陰滿壁池乃

命樂官按鈞天之奏舞干篇之儀金砌鳳簫間朱絲之
疏越銅槃龍纂陳翠俎之馨香講藝霞帷捫碑
蘚徑寒烟射圃舊井猶存暮草書堂故臺不廢

壁花牋之綵賦

賜文綺之錦裘

丹詔一封戶邀蠲稅綠綈萬卷家承賜書遂使昌平亭

下山花拂香

輦之傍安樂里中林草映春旗之上

詣孔阡而醺酒識藏珠埋玉之鄉祠周廟而陳詞過

巢鳳棲鸞之閣

臣

叔元濫名詞翰備位辟雍觀

盛事於文明蠡筵竊愧擬小言而弇陋梗概微

陳

海內承平日神京扼建瓴山河鍾瑞氣珪玉協

英靈禮樂昭三代文章炳六經乾符膺

大位皇極繫

明廷釋菜歌修德銷戈識緩刑芙蓉通

月殿翡翠敞雲屏

玉詔頒巡狩

金輿出禁庭千門仙仗動萬騎綵旂停畫扇裝珠彩香

羈飾翠翎文裘輕雪犯錦裘曉煙零瑤策探遺
篋雕輪過野垌碧霞明月嶺白草繡江亭孔竇
靈祠迴防山古樹冥薨標承紫闥榱隲朱櫺
龍勺涵椒液雷尊閱桂醢牲牢憑致享黍稷薦
維馨煙折荒碑綠苔延古甃青緇帷瞻氣象繡
衮觀儀型

宸藻蒐東壁

天書降北溟四門驚妙筆翰墨動微星

恭和

聖製甲子冬至幸闕里詩

翰林院侍讀學士

臣

沈上堦

洙泗開儒業千秋尚肯堂若非觀孔壁誰復憶
堯牆車服形聲近詩書歷數長見聞俱有託

天子正垂裳

聖駕幸闕里釋奠

先師禮成恭紀

翰林院侍讀學士臣沈上墉

在昔舜東巡二月至岱宗我

皇初幸魯帝車指孟冬豈惟侔輯瑞實欲遡聖蹤徘徊
曲阜邑陟降夫子宫雍雍冠履澤穆穆俎豆容
悠然見意象鑽仰表幽通泰山高無極海水深
無窮星辰宿其下日月浴其中斯文歷億載高
深與之同大哉符元化仔肩賴

王躬

恭和

聖製甲子冬至幸闕里詩

日講官起居注翰林院侍讀學士臣高士奇

百里分圭地千秋習禮堂

聖人猶止輦庸賤得循牆簋豆陳儀備笙鼗入奏長崇

文修曠典刪述佐垂裳

御書萬世師表四字留闕里恭紀二首

日講官起居注翰林院侍讀學士臣高士奇

數仞宮牆不可梯龍鸞親見自

天題君師作統源相合德業同符事豈睽肆映雕櫺金
碧淺新懸繡棋日星低唐碑宋蹕渾堪陋漫說
曩篇寶綠綈

其二

明染潔鬯禮方殷喜觀

宸章簇五雲門際和風迎毓粹閣前晴靄動奎文諸生
羽籥觀型遠四氏絃歌肄業勤爭說師儒遭

盛代寵光縫掖總同分

扈從

駕幸孔林恭紀百韻

日講官起居注翰林院侍讀學士

臣高士奇

禮樂雍容日車書順應年兩儀輝碧落萬緯聚
珠躔治洽苞符啓

心勤警蹕宣燭柴青帝右釋菜素王前遣祀
封陋徃編鄩卣犧象設簋簠鼓鐘懸念典多弘

獎齋誠更潔蠲迴鑣辭檜殿結軫度松阡磬折
諸儒凜趨蹌庶尹虔圭門紆錦轡石表拂華旃
境迴神爰宅功高報迺專緬元氣毓翕闔太
和金灌木千章蔭穹碑百氏鐫迢迢循寶埒肅
肅繚周塤陟降方顯若低回倍儼然峰巒交體
勢水澤互盤旋野向奎婁指山看鳬嶧連面離
文炳蔚吞巽脈纏綿虹影迎洙跨雲岡擁泗眠
羣靈咸萃矣至道永藏焉異兆留黃玉新裡鬱

紫煙蟲魚蟠篆古劍笏卓跌堅翠密層霄翳蒼
深老幹蜷探著占大易捫楷憶名賢壇位星辰
燦階基雨露鮮荆榛從不擾禽鳥亦知遷四顧
規模豁千秋統緒延思堂開別寢射圃望遙塵
觀以誅奸葺衢因殯母傳蜿蜒環舊蹟森錯接
重枌壟畔班昭穆垣端列後先墓廬茅尚覆享
室燎長燃帶礪傳家久絲綸錫祉駢瞻崇逾家
冕撫玩及栝棧況值溫初轉欣逢景最妍晴霞

籠

瑞輦細靄簇仙輶地籟參差發天香縹緲聯謹恭生
近衛儼恪逮中涓鳳德寰區外

龍顏咫尺邊精微原合撰造化偶分權慕想

宸襟切褒揚

睿照淵聖蹤常鴈鴈王道適平平廣運禎祥集洪鈞品
類甄殊疆通羽籥薄海靜戈鋌動植皆繁暢陰
陽少伏愆三才民紀立五教學宮詮喜邁

鸞聲噉俄停鶴蓋圓橫經喧曳踵負未競摩肩勸激
增縫掖光榮被縵絃雷歡童叟沸雀舞巷塗填
粵昔供芹藻嘗聞執豆籩隆稱雖屢進故事但
相沿漢創陳牢制唐餘薦醴筵宋亭苔已蝕元
碣草徒芊曲阜云憑軾遺墟幾控鞭真邀
恩數渥獨識

眷懷偏肇迹源鄒魯垂型亘幅員殷宗存續述姬轍挽
迤邐吾黨誰能贊斯人詎忍捐攬綏遵率土振

鐸引蒙泉篤信刪修敏詢疑應對便微詞明賞
罰善誘取狂僇浩瀚滄瀛際巍峩泰岱顛護呵
侔社稷悠久並坤乾慨自淳風邈滋為雜說穿
老莊談未息楊墨焰隨煎寂滅求迦葉清虛訪
偓佺紛岐爭欲逞習俗苦難悛正誼於今揭頽
流一旦湔仰鑽勞寤寐矜式徧垓埏小子居蓬
輦髻齡託槩鉛考束言寡要窮理慮空研略涉
笙簧苑粗耘筆硯田審觀牆甚短甘守戶終鍵

志本簞瓢樂情兼釣弋牽衣冠何樸鄙捐讓每
拘攣且謂南樓越安期北走燕纖鱗纔溯泳駕
足遽騰鶩受祿懷新秩凝紳改舊氈成均曾肄
業

講幄又堂銓午給池頭繪宵擎禁裏蓮珥彤當繡柱
繡帙侍花甄淺測慙操蠡庸才遜選錢漫摹壺
汁字時擘衍波箋竊歎身縻爵良由士佩璫服
膺倦几席秉訓比韋絃既夾雙螭案還陪八駿

羈輪蹄借絡繹罕單覩飄翩河濟銀髮騎江淮
畫鷁船倚歟林廟邇暫此去來遙徙倚臨城闕
踟躕眺桷樑飛軒楹赫赫邃宇谷裕裕器得稽
彝鼎銘猶記粥饘附塵奚啻壤歸壑頗如川遇

主茲堪幸親師夙有緣懦頑希就準愚賤敢忘筌

彩仗寒郊綯

璿題傑構塞洵哉敦誦法非直寄遊畋語似依梁翼鳴

同抱樹蟬未工虞監句差擬李丞篇

幸闕里賦有序

日講官起居注翰林院侍讀學士臣高士奇

隆古之世作君作師理同事一三代以還君師之統分矣夫祖述堯舜憲章文武聖人之學本師帝王貴貴賢賢彼此迭尚君師之理何嘗不同條共貫哉漢自高祖逮於建武永平元和延光之世唐則乾封開元宋則大中祥符皆降萬乘之尊折節韋布議者謂或儉於德或歉於時

元明遣官祭告修舉具文而已

上以底定之餘緝熙勤學詩書之澤蒸於穹壤乃復

躬祀闕里昭茲隆軌今古希遺儒生幸焉臣以陋劣珥

筆從

六轡之後獲觀

盛典使闕而不書無以昭我

皇上右文之治臣滋愧矣爰拜手稽首而作賦曰

歲紀闕逢月臨黃鍾三辰協極四野告豐勞農

息力索蜡報功暄將迴乎春谷霜不殺乎寒叢
天子既飛旆於江淮之表旋軫於濟河之封顧瞻魯邑
罍然其宮伊素王之舊宅接青帝之崇墉森亘
峙兮南北錯相瞰兮西東爰乃翦翠鳳翼蒼龍
遵修陸景遐蹤絡繹乎其奔會者若趨蹌之亞
亞疾徐乎其進止者若俎豆之雍雍詎探奇於
岫嶺類問道於崆峒時則風伯斂颺雨師收霖
碧蘚承輪丹楓蔭輶日華於林霞綺於陌天地為

之而澄宇山川因之而絢色折衝欽飛之旅執
父而荷戈出警入蹕之臣吟鞭而頌策單單遙
舒簫韶競集目泝兮洙泗之靈源心游兮金絲
之奧室褒成之後夾畫輈以拱立四氏之徒羅
芳徑以通籍結羽葆兮開重闥導鳴鸞兮入聖
域陋叔孫之禮儀喑諸儒之故實啓帳殿以齋
居進行帷而盥食於是乎籌人戒旦裘人視明
祝人潔幣宰人刑牲苾苾兮秬鬯匡敕兮棗盛

將車服兮在望即履約兮畢呈焜煌兮碧甃灼
爍兮朱楹藹藹乎三檜之植赫赫乎七壁之銘
歷階而進焉矩步而行焉盥洗以致乃敬焉釋
奠以告乃成焉其禮器則有山雷象勺籩寶鉶
羹合蕭揚燎髣髴兮神明其樂舞則有朱干玉
戚鼗鼓匏笙登歌間詠洋溢兮韶英

上乃紓睿慮之乾乾湛宸容之穆穆九流仰鏡萬古欽
躅銀鈎鐵畫揭藻彩於日星珠榜璇題聳嶒岵

於寥廓交窗之楹霧爭霏對雷之簷暉欲落肅
寢周廊重櫺關桷仰兮如翬俯兮若啄晝徐徐
兮杏壇夕曖曖兮松幄迴二氣之慘舒駐千年
之晦朔言憩乎詩禮之堂載升乎奎文之閣几
策并陳絃誦可作莫不開龍顏之一霽歎鳳德
之猶昨既徘徊以容與復諮謀而詢度迨於緩
琴轡迴玉軫坐講堂聯庶尹念儒林之繁會矧
聖里之標準詔子弟以修鼓篋之儀儼膠庠而

播道鐸之警韋編並啓壁書無隱闡大義兮方
昭續微言兮未泯琅琅兮天語若鐘鏞之初叩
亶亶兮經生若函丈之羣請周旋中規進退惟
謹若夫嶧山之傍尼山之畛望五老之峰而迴
車訪坤靈之洞而結勒或起或伏或遠或近撫
往蹟以留連覲遺徽於夢寢於是乎出自北門
瞻彼中林想衣冠於馬鬣之道數封植於兔溝
之潯岱撤壤以培其厚海飛沫以環其深氣阡

阡而奕奕景鬱鬱而沈沈其石則有龜趺距丈
麟碣摩尋翁仲秉笏華表棲禽其木則有文楷
攢繡蒼柏接陰欒檀布戟枌柞抽簪繚樊垣以
為衛戒採拾而靡侵荆不芟兮自剪草皆茁兮
成琛恍精誠之有格式憑眺之常欽伊神符而
道合斯豁目而暢心是日也巽風匝地解澤彌
天屯膏勿壅渙號勤宣既省耕而省斂亦議恤
而議蠲帝王之轍迴矣聖人之澤存焉爰及苗

商世守土田戶復於籍丁免於屢攬謠俗兮周
知予疾苦歷郡縣兮弗改予質遷懸寬租於令
甲戒索賦於窮壤更乃收白虎之幡樹金雞之
竿振鷄鷺之武騰蒼黎之歡照曜兮廣輪之曦
旭霑濡兮率土之垓埏蕩蕩乎德乃至巍巍乎
功始全粵稽一元肇分三才爰立上下定位尊
卑別秩惟馭世之弘綱與覺民之懿蹟理並符
乎幬載數相殫予翕闢緬古皇圖咸崇儒術或

創緒於兵戈或蒙安於宗祏或希心於汰侈或
邀譽於潤色縱陟降之在庭未炳蔚乎史冊伊
昭代之授錄兮踵禹範於義畫維我

皇之凝祉兮絜堯樽與舜瑟綜性道而煥文章兮建君
師之極則

幸魯盛典卷二十三

欽定四庫全書

幸魯盛典卷二十四

皇帝幸魯恭紀十六韻

日講官起居注翰林院侍讀學士

臣

孟亮揆

宗風百代尊東魯闕里堂高

萬乘躋泗水波瀾無別派尼山草木自成蹊

聖朝幸際同文盛師表親勞

當宁題乍報雲霄雙仗下旋看俎豆兩楹齊馨香咫尺

神能格舞佾雍容典備稽濟濟儒官分奠尊煒
熒燎火勝然屏色凝

帝袞山龍麗光燭天門日月低還

御講筵披載籍直從性學剖端倪六經奧窔資探索一
畫精微賴唱提

清蹕再移奎閣上

翠華重駐杏壇西鼎彝三代名偏古蝌蚪千秋字不
迷車服宛如陳琬琰宮牆真欲拂虹霓菁蔥樹

引儀庭鳳巖巖碑傳扶石貌華蓋留時多紫氣
黃封開處燦金泥輝煌

賜錦從天降迴合祥烟滿袖攜釋奠禮成超往躅誕
敷文德徧羣黎

恭逢

車駕幸闕里述

聖政雅有序

日講官起居注翰林院侍讀學士臣顧
沂

伏讀詩大小雅見周文武成康之盛維時德政
涵濡教化翔洽朝廷清明重譯賓服天子端拱
穆清之上公卿百職事奮庸於下亦罔不有史
臣簪筆執簡發揚徽美夫如是故成周之治遠
而益彰久而彌光至今望之若太和在宇宙間
是以述君臣燕饗則有桑扈魚藻述徒御蒐狩
則有車攻吉日述安集勞民則有鴻雁黍苗述
董正治官則有崧高烝民韓奕當時誦之奕世

傳之聲光絢赫垂於無窮以雅詩存焉故也伏
覩

皇上御極二紀之中

聖德神功負絕千古嘉謨仁政美不勝書邇者運際上
元時逢景慶六府修三事治乃猶兢兢業業慮
醇化之未遠屆而兆民之未盡阜成也遂

允禮臣之請倣古巡省之儀於是

駕玉輅揚清塵不煩警蹕不費芻茭川嶽為之壯采

草木為之風生至於岱宗祇祓齋宮登壇奠獻
金石迭奏柴燎升中凝神遐覽精誠通格蓋唐
虞氏之所以巡方岳也

幸闕里祀孔林禮嚴九拜法垂千禩留曲蓋以示虔
懸書額以表敬彰教乎鄒魯之邦加恩於聖賢
之裔此漢祖唐宗之所以崇道統而未逮也歷
郡縣省謠俗飭官方恤老幼攸徂之民環謳聚
舞萬姓縱觀千里如堵播深仁於鍾山之陵蠲

祖課於經歷之邑蓋三代令辟之所以厚民德也然後禮備樂和福輳祥集迴

玉鸞於上都告成事於

清廟煌煌乎真

熙朝之鉅典而

高代之盛節矣然而大雅不作是簪筆執簡之臣之

責也臣誠不敏竊附侍從之列仰贊

鴻猷稱述駿業臣之職也謹撰述

聖政雅二篇雖不敢上希穆公吉甫之流登歌廟堂聲
叶律呂亦庶幾對揚

休命有以佐

皇運之昌明俾耿光大烈垂示於永永無極耳其辭曰
維彼東山五嶽之伯天帝之孫羣靈之宅

皇于時邁考厥故實誕報昊天為民祈福

雲旂揚揚鸞輅鏘鏘時

乘六龍以

幸巽方車轂夾路虎旅前行村落不擾城市依常

翠蓋泣止祀事孔備因高崇天就廣增地燔柴告虔
以遵古制乾符坤珍雲合雨澍

陟彼萬仞小視寰區東西朔南周覽無餘天門
日觀瑤牒寶書

玉趾飛舉從臣咸趨

宸翰揮灑曰惟雲峰建亭巉巖百代信崇神祇肝蠶清
明在躬禎符萃集慶成報功

維彼東山文獻之源鳬嶧嶙峋洙泗潺湲瞻彼
宣聖道貫乾坤如日經天萬古長存

廟貌巍巍輝煌闕里我

皇至止特隆典禮麟書彷彿檜樹有韡載瞻丹壁絲竹
在耳

猗與孔林楷木森森我

皇至止典禮式欽爰擴兆域致敬達誠惟聖作極惟

皇樹型

施及四氏聖賢後昆
邁茲曠典濺澤惟均

皇命多士講席橫經
授為博士稽古之榮

燦燦華蓋赭質金瑤煌煌

天章萬世師表賁鼓大鏞
明堂璧沼遙遙道統

欽承匪渺

東山十章章八句

南風之薰曲奏虞琴
阜財解愠式溥德音誰其

嗣之

皇仁至深軫念鄣屋千載一心

大江之南其水湯湯五湖巨浸澤國水鄉淮黃
合注泛濫莫當海口既堙田廬混茫

清蹕躬臨在河之許顧瞻金隄景仰神禹爰

命相視大工具舉苟利民生不惜積貯

厥田下下禹貢恒經賦甲天下後世倍增越至
有明重賦厲民江右既蠲江左猶存

嗟此江左

國之外府民命攸關公帑攸聚

皇其念之湛恩誕溥於萬斯年受天之祐

帝念民依稼穡艱難崇實務本乃克乂安吳俗奢靡傷
農之根移風易俗允賴旬宣

潔廉為體經濟為用牖民有方淳樸風動凡百
在位

天語日誦比戶盈寧聿修職貢

宮庭節儉惜費露臺化行侯甸民德歸懷田疇日闢

邦本益培民氣樂康六符泰階

登彼鍾山詣奠故陵圯垣凋木有軫

皇心毋俾樵牧春秋潔裡皇哉盛舉史冊流聲

以勵民俗以飭官常虞廷輯瑞周禮省方既洽

古典告至建章永清四海駿惠無疆

南薰十章章八句

聖駕幸闕里頌

有序

國子監祭酒

臣

曹禾

皇帝御極之二十有三年泰階既平八風時協德澤恩溥休氣翔洽羣臣推數上元甲子以為貞符運會苞維叶契允宜封禪勒成傳示無極

皇帝謙讓稽虞典巡狩禮循省風俗與兆民相見以冬十一月臻乎泰山禮成

清問下民及於江淮蠲逋賜復靡隱弗燭老稚蒿呼聲麟天地先是

命禮臣定幸魯儀制既上復籌度於

聖心典禮加崇軌物具備於是紆山谷歷險阻過周元

公廟

命親藩特祀抵闕里致齋帳殿瞻謁宮牆恭行九拜禮
樂舞畢陳奠獻加敬是日也日轉一陽星聯五
緯黃雲如幕榮光燭天

皇帝御講堂進四氏子弟說經於庭管絃鐘鼓依然見
杏壇當日之風遂

命復孔氏田祖賜諸弟子爵賚予有差

聖情優渥復灑

宸翰懸書殿楮著檜賦留

九旂曲蓋為車服禮器之光榮既乃

詣孔林醺酒隧道徘徊仰止不忍去焉臣聞道開於

天傳於帝王必聖人而在天子位者以心法相

授受故道統所歸即治統所歸三代以後皇綱

中絕篤生聖人窮不得位闡微言繼絕學集先

聖之大成以開後聖蓋遙遙三千餘歲始遇我

皇上乘玉衡握金鏡履中蹈和優入聖域孜孜典學默
契心傳接古帝之道統開中天之至治原本承
先啓後之功不勝重道尊師之念敷天之下同
然一辭頌我

聖主聖不自聖紹宗淵源文教之訖亦克與永自昔帝
王有事泰山因而幸魯其心未必與

先聖親切相承禮儀疎濶名焉而已從未有精意綢
繆情文篤摯如我

皇上者也洵乎邁汾水之遊軼崆峒之駕皇建有極為
億世作則者也臣幸際休明職慙文學竊不自
揆爰獻頌曰

天眷

皇德肇起隆平有蠻勿共距陽翹萌

帝布聖武滌濯廓清川嶽呈瑞河圖器車堂陞肅穆雍
容雅魚婉婉赤子以涵以濡載稽典禮乃駕八
騶省耕省斂一豫一遊臻乎泰山對天之休繩

檢踰侈七十二君

帝為民出夙古疇倫惟虞暨周以時四巡朱紱麟角吐

書鄴鄉長夜有耀毓我素王鬱蔥山林輪奐構

堂

天子至尊降拜其師

帝敬在德羹牆覲之陋彼漢宋夸大史辭經自壁顯壁

以銘昭一揆同符曠世是遭

聖以紹聖音徽匪遠元公經緯洙泗折衷廟貌赫觀甫

柏徠松徧秩羣儒賜書褒崇懿茲盛典振古未
逢民有懿東士有範模

天子于邁流澤則那德化順成扶觀載途君舉則書後
世之則道扇八區化被四極萬有千歲永言無
斁

幸魯頌

有序

左春坊左庶子掌坊事兼翰林院侍讀周弘

皇帝御極之二十有三年海內乂安黎元樂育年穀熟

衍符貺委臻廷臣上言自古帝王靡不嶽狩由
三代降茲禮弗陳欽惟

皇上神聖文武治化極天蟠地宜倣虞周省方觀牧
天子然之令具儀注依古舉行既又謂

先師孔子教垂無極宜

躬往致敬巡行典禮莫此為重冬十一月

駕幸山東特詣曲阜假於孔林釋奠陟講堂觀車服

禮器

命孔氏諸生說書

行殿園橋觀聽濟濟洋洋耆老嘆嗟庶士興勵

天子慨然思維至德

御書萬世師表以識景仰又製詩及賦用紀厥盛乃沛德音孔氏子孫與執事者

賜官賞賚有差已復允衍聖公孔毓圻請

詔選文學士纂誌盛典垂不朽臣弘伏在草土竊聞忝

舞逾年赴

闕道歷青齊所至草野小民額手懽呼咏歌

盛德入

朝以來備悉儀制伏念古者巡狩惟是考校度程廉
問疾苦崇儒重道之文缺然未詳其有右文令
主表章絕學又或高拱深宮時巡弗舉臨雍視
學祇在京圻不克親詣聖里肇稱祀事我

皇上聖學宏深心契精一時敏孜孜緝熙罔間故能斟酌古禮丕顯文教

法駕肅臨崇極儀軌振古未有臣弘職隸史館義得

推揚

鴻業宣示臣庶不揆寡陋伏竭悃忱乃載拜稽首而

獻頌曰

維

皇受命神威遐暨靡壤不歸靡德不被聲教誕敷鴻文

斯賁迺

勅廷臣修明古制一章

維古今辟代隆巡狩神徂道塞曠不復遘遙遙
千載事忘其舊維

皇稽古前猷允茂

二章

恢恢

皇度翼翼

帝容六龍時御至於岱宗顧瞻闕里聖教攸崇駕言往

臨和鸞雖雖

三章

有鬱其林有翼其廟我

皇矣止敬將昭報威儀孔嘉萬邦式效聖裔稽首臣宗

有耀四章

帝曰來前予崇乃先其帥乃宗遺言是宣諸生揖讓舊

德儼然陳篋執經輝分璧躔五章

俎豆在旁詩書在列多士欽承

帝心嘉悅灑翰揮毫雲飛電掣炳蔚其文光於前哲六章

章

瞻彼庭中嘉樹森森黛色霜皮歲月孔深維

皇作賦式昭德音麗藻雲章永表泮林

七章

多士傾風

皇心未已解澤旁流巽風習起推仁遺胄榮施閭里臣

職何堪

君恩厚矣

八章

殷禮既具寵光既燦萬邦有慶歌呼踴躍勉為

忠孝毋為浮薄我

后儀型于焉昭灼

九章

聖有微言我

皇彰之聖有孫子我

皇揚之聖教丕新開之匡之維古令辟曷其尚之十章

於維駿業古莫云覲其始自今宜昭示後載編

載輯揚輝宇宙王道平平垂為法守十一章

眇茲小臣珥筆振纓感遇昌期願言獻誠奕奕

顯猷厥徽難名恭陳鄙辭用播休聲十二章

聖駕幸魯釋奠

先師恭紀

日講官起居注右春坊右庶子兼翰林院侍講加二級臣高 喬

曠代逢

真主千秋慰

素王省方因展祀望道遂升堂百辟衣冠肅三辰旌
旆揚東山瞻企遠泗水溯洄長典禮稽宗伯威
儀凜太常至誠親盥薦惟德有馨香歆自居天
上靈宜格帝傍垂旒如在座入室見於牆老櫨

承

天語貞珉勒

御章

高文懸日月大雅振宮商實乃敷天慶非徒後嗣光

冊書傳罔極德美孰能颺

上幸闕里記

大理寺左少卿臣許三禮

康熙二十有三年甲子遇易之乾溯軒黃製干

支前蓋歷九百六十年者五之終六之始也子
興氏所謂千歲日至十五歷元求可坐致者蓋
實指是考唐開元十二年乾甲子至二十七年
為先師封王之始從西牖正南面位迄今康熙
二十六年建表先師碑亦九百六十餘年非偶
然也又考乾道壬辰宋先賢朱熹倣聖經作綱
目年計今歲在丁卯殆五百歲有奇

御書學達性天扁額於宋六賢周張二程邵朱書院亦

儒學明晦之一驗也天生

聖人應運而起使吾道昌明在此時矣讀碑文首曰道
原於天弘之者聖上自伏羲一畫虞廷一中孔
門一貫皆不出此二言夫原天之心者何好生
是也好生仁也

先師上承羲堯下與顏曾諸賢終日講求無非此志
此物且指明萬世儒者曰存誠曰主敬曰窮理
曰致知以至尊德性也道問學也又原頭在是

道岸亦在是豈非四千年所未發之旨盡開明
於今日耶況作君作師其道無兩我

皇上以天有四府聖有四府之訓昭示諸臣乃知贊剛
作定六經者上備元亨利貞之天德中集皇帝
王霸之治統下包生長收藏天下萬世之民物
又不止以易詩書春秋禮樂六經法天而已也
所以俎豆億萬斯年未艾者至今日愈著總之
我

皇上之尊聖也旌賢也崇儒也皆所以明道於前古後
今也九百六十年甲子又乾之際會天道於此
再中聖學於此重光

幸魯一舉其所關豈淺鮮哉臣未得侍扈從之班與珥
筆諸臣載颺盛事惟考運會適符之數而記之
若此

聖駕幸闕里恭頌二律

光祿寺少

卿臣李仙根

天亶聰明協素王斯文寤寐見宮牆即看

玉輅臨洙水已闢榛蕪到講堂撫柱蛟龍爭煥彩陳
書蝌蚪自飄香遙知登降千秋契夢奠宗子啓
聖皇

其二

若堂若斧正莪莪

駐蹕高亭取次過檻外神蓍先應瑞林中文鳥總能
歌勝衣子弟陪

行幄應調農桑放正科誦法是人含至性

皇恩聖澤更如何

聖駕幸魯恭紀十韻

兵部督捕左理事官臣王承祖

聖主乘乾御

宸修集大成省方先輯瑞旋

蹕遂東行宅里懷芳躅羨牆動

聖情儒官陳俎豆古樂備韶韻殿廡親瞻拜橋門羨寵

榮

璇題輝路寢芝蓋錫金莖

輦道巡遊闕雲亭

駐蹕名翠珉鐫

寶翰碧瓦麗朱甍

帝典隆親祀臣歌喜載賡奎婁增彩耀萬世仰文明

聖駕幸闕里釋奠

先師恭賦

兵部督捕左理事官臣陳肇昌

省方遵禹迹

訪道見堯牆不惜崆峒拜爰登洙泗堂

君師原一德冠劍儼分行環沼排

仙仗升歌備樂章諸生殷禮服博士駿趨蹌彷彿見商

楹夢重開孔壁藏金絲如可聽鳳鳥若為翔斗

上飛黃玉壇邊拂石床餘霞流古檜灰劫耀靈

光文物輝齊魯聲名陋漢唐千秋懸日月六籍

總笙簧幸際崇儒盛雕蟲愧頌揚

聖駕幸闕里恭紀五十韻

通政使司左參議臣勞之辨

伊姚誰繼軌我

后集休隆謨烈

三朝備車書萬國同垂裳恢

聖德輯瑞協神功泰運元初會文明日正中辰居常奠

北時邁首巡東農隙乘

鸞輅

宸遊駕玉驄川原敷白露羽蓋拂丹楓欲覽衆區大爰
凌岱頂穹登封雲轡望海旭瞳矚淮甸詔民
隱句吳繪土風隨刊成績遠襟帶大河雄畫舸
浮輕鷁金隄落彩虹

回鑾由文泗

駐蹕近龜蒙麟鳳人何在美牆願久通升堂誠感格
釋菜禮優崇犧象羅彝器衣冠拜閼宮羽干陳

八佾鞀磬奏三終遺像追圖畫家傳問冶弓六
經杼壺與萬象剖鴻濛

仗自鈎陳撤碑從

御府礲

奎章文炳耀金榜字玲瓏

入廟思靈爽

瞻林羨鬱蔥幽禽聲宛宛嘉卉茁芄芄老檜留孤榦
苞著發故叢三遷開亞聖九罍溯元公似水分

江漢如山列華嵩馨香偕薦几櫬桶並鳩工廢
墜多修舉規模盡折衷龍螭朝日麗丹碧晚霞
烘道統如薪得心傳似雪融貂狐榮聖胄金綺
逮成童

賜爵恩逾渥蠲租澤更豐環橋盈博士扶杖走村翁
宿衛周廬帳從官載筆筭典方成望秩詩欲賦
車攻謏劣居卿貳疎庸忝詰戎才原慚繡虎學
祇類雕蟲盛事光前後

鴻文啓牘聳求賢符渭水問道嗣崆峒咸五登三頌徽

臣敢効忠

聖駕幸闕里恭頌八十韻

日講官起居注翰林院侍講

臣

王琰

周室兵初衅虞階羽正麾武功宣赫濯文治洽

恬熙清問

宸遊豫虛懷

聖德撫云亭非舊典洙泗飾隆儀省斂推恩日燔柴肆

觀時東行勤訪道北面切尊師魯甸郊原古尼
山述作垂宮牆猶儼在仰止豈阿私爰指奎婁
野言遵濟汶涯五雲依劍佩七曜傍旌旗沂水
蒼驪轉防山

翠輦移堵牆扶耄耄就日有童兒扈

蹕雄虹繞迎

鑾繡紱馳天香生旭采地籟息輕颺闕里初承

幸斯文實在茲羹牆心夙契宗廟美今窺典禮因時

重趨承為道卑尊嚴勞

袞冕肅穆拜壇墀

御酒聞陳藻

天衣見攝齊山河親準角堯禹覲鬚眉門想麟書吐庭
懷鯉訓貽登堂儼詩禮入室恍金絲鼓篋章縫
列談經講席施班聯園豹尾

黼座設皋比几研雲文拭韋編竹素披儀容瞻道子車
服問鍾離琴磬仍歌詠尊罍舊戲嬉兩朝存殘

竿六代備咸池漆簡蟲魚誤丹書識緯疑臨觀
深嚮往每事費

諏諮刪述絃歌地烝嘗俎豆祠檜身文甃蠹杏榦石
壇歌緬想春風舞摩挲手澤遺下垂無復葉左
紐尚餘枝叟相循遺圃靈光指故基高門森巖
窠舊井碧連漪蒼鬱佳城近蒼茫后土治鳥禽
翔羽葆荆棘避華轍展謁重鋪繡馨香更酌卮
地靈鍾異木幽贊挺神著結構曩賢慕躋攀昔

代思蹕亭花寂歷輦路草葳蕤白石埋秦冢蒼
苔蝕漢碑

停輿還繾綣駐馬重嗟咨攬躋登臨勝懷風倚眺遲
芎芥還戾止小大畢追隨曲蓋分

仙仗朱絃進絳帷

皇情忻款洽

御墨灑淋漓四韻藏元氣千言發衆詞留傳方雅頌什

襲比宗彝

寵賚驚稠疊

殊恩邁等差
土田宗子錫
貂錦上公宜
講義宣弘正
光榮過孔僖
彈冠何綽約
結綬並逶迤

賜復優仁里
蠲租助潔粢
汪波均四氏
異數及諸姬
更許貞珉勒
兼承

睿藻摘殷盤
支可削史籀
拙堪嗤琢玉
蒼崖古擬金

紫殿竒負來
知鼎鼐捧至
必蚪螭木鐸
聲逾振秋陽

道未萎

龍章方日煥鳳德詎云衰
陋矣巡瑤水荒哉訪具茨
苞符逢泰運元會叶昌期
周孔心源接羲軒道法
追薪傳無熄火鐵引恰歸
磁先後應同揆尊行
即見知三千開禮樂十六
紹微危河海流方永
高深德正禪一中惟大寶
半部是元龜堂與今真到
藩籬豈暫闕乾封蓋執弭
建武避交綏長夜渾
如旦中天共仰曦微言增
皜皜至治益丕丕仁
義腴生色詩書味浹肌
名家祛雜霸異學杜淫

談望斗光彌燦占兵氣益隳駕車閒駉駉脫劍
散熊羆未得隨

彪仗徒然握兔錐右文歌盛事載筆效陳詩

甲子冬

上幸闕里釋奠恭紀二律

左春坊左諭德兼翰林院修撰

臣閻世繩

吾

皇重道先文治釋奠新從闕里還數仞宮牆環泗水雙

懸日月照尼山生徒攜策聞

天語父老扶筇望

聖顏仙檜當年曾手植幾經風雨尚爛斑

其二

登堂禮器垂

清問

玉輅親過洙水橋墓上著抽先後節林中楷發短長

條纂修盛舉誇前史給復

殊恩詠

聖朝世際昇平逢甲子年年玉燭喜常調

甲子冬

上幸闕里釋奠恭紀二十韻

右春坊右諭德兼翰林院修撰

臣

李鎧

泗水流真氣尼山蘊化工由來修俎豆未有動
昭融甲子符昌運時巡邁古風特紆

元后駕親謁素王宮龍角攜杓北

鑾輿出震東

翠旂松檜外

丹宸畫圖中即次千官列升堂萬舞同肅雍稱盛禮

齊邀秉清衷果見羹牆接仍聞肝鬲通

睿文垂景曜

宸翰麗高穹

講幄親開帙園橋盡發朦統承軒昊遠典視漢唐崇

過基還瞻仰披林更鬱葱石壇留勝蹟蒼草擢

寒叢鳳德歌猶在麟書道不窮六經探魯壁七
聖溯姬公展事祠官領傳祧博士充三階光炳
煜八表澤履洪神貺無疆歷天開不世功微臣
慙珥筆拜手頌熙隆

幸魯盛典卷二十四

欽定四庫全書

幸魯盛典卷二十五

聖駕幸魯恭紀十律

有序

左春坊左中允兼翰林院編修

臣

李 枏

皇帝御極之二十三年海宇清晏雨暘時若文德覃敷
聲教四訖於是勤

法駕幸魯郊祀

先師孔子再移

蹕展墓

親灑宸翰勒碑顏額製檜賦及詩以垂訓來茲傳示無

極

賜東野之爵卹先儒之裔下至陪祀諸臣無不仰沾

聖澤異數隆文具載

盛典臣職忝詞苑伏見

皇帝崇儒重道稽古好文書契未有宜作為歌詩導揚

美善不敢以淺陋不文為辭謹臚叙前事撰五

言詩十章以竊附於虞書賡載歌之義其詞曰
明倫三代重視學百王同幾見移

仙仗親來祀魯宮雍雍瞻拜肅穆穆悃誠通
輦路歡聲徹

今皇禮數崇

其二

九儀方告備展墓復停

鑒文楷干霄直長松倚壑寒風來聽絲竹日落想衣

冠曲蓋留

恩寵從今重禮官

其三

銘功還勒石鼎廬講堂前

御筆蛟影舞

高文日月懸硬黃存楷法飛白見真傳十字延陵碣輝

光相後先

其四

高楮

親署額揮灑動乾坤一覩

天章麗羣知師表尊寒光凝壁沼壯采眩橋門萬世儀
型立微言更討論

其五

老檜聳千尺當時手自我經寒不改操歷久見
奇材聖道真如此

王言實大哉良辰披卷讀雲漢互昭回

其六

至聖羹牆見題詩志景行微言探玉簡條理應
金聲游夏何由贊臯夔孰敢賡寧惟風雅事五
字得長城

其七

官禮元公定貽謀百代遵明堂圖自在東野澤
將湮

天子思功德書生列縉紳魯源誇父老重見繡裳新

其八

一中遙授受異代見傳心統系存濂洛危微自
古今守先家學遠啓後

國恩深四姓齊肩日長聽絃誦音

其九

升堂羣執事拜舞覲

天容奠掌兩行肅循牆三命恭何當

頒爵賞取次到章縫濟濟欣相告新沾雨露濃

其十

學竝尼山峙

思隨泗水流
非成書一代何以法千秋
藝苑傳歌咏
儒

林備纂修

興朝典禮在什襲儼共球

大駕幸闕里頌并序

右春坊右中允兼翰林院編修

臣

胡會恩

臣聞德藝之宗均為樂祖道法之萃彙於

素王百辟藉其師資二儀耀其符采是以昌平誕降
瑞應端門曲阜既遷名仍鄆里城北藏經之壁
序立鐘鏞泗濱臥斧之封壇存瓊甍鴻號頻加
於累代隆文有待於

聖朝我

皇上乾德時乘泰符躬叶霸臺偃伯武庫韜戈西序東
膠夙聞憲乞名山顯位亟望升中顧乃典陋金
泥文芟玉簡歲維星紀律轉黃鐘既輯瑞以陳

風聿

省方而正俗

駐鑒興於充土羅

法從於孔林用修釋奠之儀丕振右文之治舞陳八
佾綴兆咸齊樂奏三終俎殽畢備裸將展恪肅
拜加崇於是

臨絲竹之堂進褒成之裔繹微言於魯論闡奧旨於
義爰周覽瑩林徘徊廟寢象環綦組儼覲衣冠

文檜靈著如親手澤

宸章遄灑

奎畫旋昭鸞軒鳳翥之煒煌玉振金聲之條理固已光
懸日月色映球圖矣若乃上公紫綺之

頌榮分藻火四氏清華之秩寵溢簪裾由茲掃闢榛
蕪宏開聖域昭回雲漢屹峙豐碑沛蠲租置戶
之仁舉衛道宗儒之事此皆

皇上心源獨契先後同符統緒相承古今特立之盛軌

也小臣忝鄙備職禁林敬播頌聲以昭曠典頌
曰維

皇受命藝極陳常武功用戢文德乃彰納民軌物養士
膠庠覃我

聖化敷我

王章廣厲學宮以弘儒術六經煌煌功歸刪述是集大
成教思洋溢

帝曰欽哉奉茲表帥爰修肆覲駕言徂東樂御德車肅

肅雍雍百爾執事莫不率從宮牆我我孔子舊
宅有鬱者塋徠松甫柏禮器攸存儒風大闢

天步式臨攬厥勝只載拜展謁必恭敬只洋洋聖澤惟
游泳只升堂入室美莫罄只豆登在列金石在
懸儀型載仰有縱自天侑以玉爵肆以朱絃兩
楹既奠式禮莫愆迺陟講堂講堂翼翼迺周官
庭宮庭殖殖迺汲甘泉迺撫嘉植草木向榮山
川潤色有斐

天章藻耀高翔有輝

寶翰金薤琳琅為典為則于羹于牆欽茲道德世紀彌
長迺官聖孫迺錄賢系載弁俅俅以繩以繼羽
葆繽紛以光廟祭文綺豐貂以

錫哲嗣廓聖之緒惟

帝之功鉅典昌明闕里之宮皇哉

湛恩昭哉禮容尼山大宗永紹厥封前有周公後有孟
子竝勒碑銘以綏仰止

帝絃皇綱載揚休美於萬斯年垂光信史

皇帝幸闕里釋奠恭紀

右春坊右中允兼翰林院編修臣李澄中

前年甲子十月時

皇帝問俗先尊師諸侯朝會泰嶽畢

翠華更指泗水湄左亳右社兩觀出層城曲阜何逶

迤登堂禮器制度古山壘玉豆兼鼎彝麾旂首

尾雜綵繪應鼗響答笙管吹翩翩翟翥自萬舞

猗那歌頌無參差我

皇盥獻肅再拜微風不動揚靈旗於昭

至聖儼陟降馨香明德遙相追杏壇卓立懷英字書
藏魯壁聞金絲老檜依稀記手植風霜駁蝕苔
蘚皮旋紋屈蟠金鐵骨蒼鱗怒茁虬龍枝更遵
輦路謁

聖墓石壇一望形纍纍千章喬木絕鳥雀楷旁剩有
叢生著真宗東封駐蹕處至今亭子留遺規

宸章高揭懸日月十行仰睹爾雅辭詩律賦記妙風格
天葩燦爛雲霞垂鳳蓋

賜出表異數

御額題作十年基廟中玉節寒旂檐前金薤春歲蕤
鬼神歲歲共呵護屏除木魅奔妖螭世官博士
逮四子元公遺愛分諸姬

聖朝名器豈濫與要為吾道存網維漢帝太牢誌過魯
貞觀釋奠弘唐治豈若吾

皇闡精一修明經傳文在茲幸逢盛典愧揚厲恭頌辟

雍明堂詩

大駕南巡賦

日講官起居注右春坊右中允兼翰林院編修

臣

徐嘉炎

粵我

皇清之總三才而襲氣母兮歷

三聖而冠百王惟

聖主之首出乎庶物兮鼓橐籥而播陰陽當甲子青龍

之元會兮赫景命而召禎祥誕五德之純精兮
開萬禩而輝煌耕獵道德而為苑囿兮馳騁仁
義以為津梁光無幽而不燭兮澤無往而不彰
紹盤羲而代壇兮孕苞符而統混茫既四海之
寧壹兮乃兆人之如傷作雷雨之解而在宥兮
象風地之觀而

省方爾乃建霓旌張鳳旆雲罕日旂虹幢羽蓋萬騎
繽紛千乘繁會乃先沛膏雨於垓埏集羣生於

覆載倣天乙之弛羅儀鎬京之大賚蠲南國之
倉箱望東州而賑貸推恩數於羣臣賓化育於
無外於時背秋涉冬寒氣始升焦溪漸涸湯谷
將凝水澤之腹既堅不周之風斯興木脫葉而
童童草解節而稜稜吾

皇於是駕雲龍之飛輅張秋隼之華旗飾軍容於七萃
申武衛於三驅隆隆記里之鼓犇犇相風之車
散轡於漁陽之野校戎於龍旂之墟則有屏翳

清塵望舒懸象飭馳道之離宮闢修途之榛莽
有轍轍之攀躋非眈眈之弘敞眷北顧而逶迤
憑南雲而下上值三農之休暇惟六龍之是望
極九有之神功爰告成於岱宗咄齊桓之望瑞
陋漢武之乾封為民儲祉秩叙庸望天孫而
至止仰日觀而雍容爰祇誠而徒步乃獨致夫
虔恭

乘輿屏其勿御腰褭却而罔從懸崖垂二分之足絕

壁俯萬尋之松似捫參以厯井若凌虛而御風
翔天門而排閭闔經千樹而瞰三官胼胝均勤
乎大禹焦勞重見乎神農時則衛士嚴裝從臣
啓路釐室儼晨齋官戒暮慶成乎答天之禮敷
告乎勤民之故神人允協其休和臣氓式遵夫
矩度鷗車東振闡戟南翔渡沂洸而行邁涉汶
泗而飛揚巡河濱而周歷思漱水之溝防玩璿
珠於漆澤屯楫石於宣房招河伯以效靈顧海

若而望洋南際邦溝北始汜光嗟泛濫之愁人
致污萊之卒荒經營乎潰決之陂疆理乎橫流
之場必鑿海而歸墟斯我田之既臧何水衡之
足惜為當救此一方駕餘艘之乘舟杭一葦而
南浮任長風之破浪亦沿波而汧游蕩日青龍
之艦排雲飛燕之樓組練耀昆明之浦帆檣聯
彭蠡之洲牙旂桂楫赤舳銀鈎涵泳則羣山遙
指溯洄則百川競流盡乾坤於一瞬坼吳楚而

為漚緬六代之繁華經千年之建業瞻虎踞於
名都指牛頭為天闕隘紫蓋之偏安狹金車於
李葉睠故國之山陵乃追揚其謨烈稽運會之
始終嘉唐虞之盛節致隆儀於軼代戢軍氓之
剪伐斯無前之至德實靡有之軌轍惟經綸天
下之大經迺曠世同符而莫越南眺吳會清嘉
之宇俗號秀民地非沃土攬轉運之京城恤煩
疲之廩庾襟茂苑於具區帶橫塘於江浦遡泰

伯於千秋起言游於三古稽山在望胥濤驚眼
勤望幸於黔江佇况榮而宛轉念

兩宮之暫離遂

六龍之旋返植梧鳳於岡陵斲修蛇於墳衍馳延屬之
紆途陟荆楚之峻坂灑

宸章於妙高登浮玉而遐覽黃童襁負以待澤黎庶謳
吟而送遠觀乎人文以道化成景終古之教澤
過關里而式憑大猷是經先民是程尊元公而

開元聖由素王以及素臣仰

帝師而下拜志重道以弘文晰欒檀雒離之木辨雞
彝龍勺之銘翠古檜之菁蔥撫楷模之輪囷湯
湯乎洙泗之流屹屹乎防阜之城結山河之兩
戒鍾地脈於百靈於是世胄謁禮諸生肅興倣
累朝之賓監榮先聖之雲仍制既隆於紹嘉恩
更亶乎褒成盛三雍之上儀崇百代之休稱是
日也

天子考五經之統紀思六藝之折衷爰披圖而誌績論
報德而酬庸籩豆舞佾之繁銀鏤琬琰之隆是
未足以光天德贊聖功乃留曲蓋之凝嚴軼葩
瑤之寵莛屬祇寅乎禋祀紛肸蠭而豐融廣錫
類之孝思弘論說之儒風歷漢元以迄今茲誰
尊聖之克同爰乃

迴駕旋軫飛輦整旃鳳轡玲瓏麟毫琴麗張廣樂於
洞庭舞咸池於北冀千鈞之虞力洪萬石之鐘

音備賦忠厚於行輦歌太平於既醉千疆靈赴
萬里星奔東橫滄海西耀玉門奠斗辰於皇極
布星宿於崑崙日南則威加窮髮漠北則武震
烏孫重舌緩耳之國雕題黑齒之氓莫不來王
而慕義稽首而稱臣

皇帝猶願時雍之速屆俾風動之遄臻乃下

明詔勵羣臣崇學校飭儒紳道德文章濟濟振振遐陬
密壤過化存神是以敷天之下率土之濱含文

抱質履素懷真歌風舞雅蹈德詠仁沐浴乎詩
書之澤翺翔乎禮樂之英郊畿父老迓望

屬車千官紛會雁列鳧趨懷銀黃及璽綬佩玉虎與
金魚頌省耕省斂之舉上豐年大有之書倚歟
盛哉皇帝王三嬪之運唐虞夏遞降之餘我
皇之至德亘萬古而難踰頌曰

煌煌

聖祖創維艱兮洎我

章皇開八埏兮

皇帝聖德宏先業兮既覲文光揚武烈兮三孽既殄毒
痛除兮海不揚波同車書兮殊方貢琛入質子
兮震疊懷柔百神慰兮思我烝民際太平兮或
虞幽隱壅上聞兮

省方陳風觀我生兮登岱祈天志憂勤兮經綸參贊
遵先聖兮道一風同克永命兮有虞五載巡狩
徧兮亦越姬周十二年兮我

皇法古純不已兮時邁其邦昊天子兮小臣獻頌介景

福兮

聖子神孫永天祿兮

聖駕臨幸闕里恭紀

集選詩

左春坊左贊善兼翰林院檢討

臣周清原

我

皇秉至德

沈約

時泰玉階平

任昉

川嶽徧懷柔

顏延之

民思歌被聲

顏延之

肅肅宵駕動

陸機

凜凜天

氣清曹攄青霞雜桂旗沈約朱軒耀金城張協

冠珮相追隨江淹駕言遠徂征陸機崇山鬱嵯

峩陸雲

禮登竚

眷情江淹

其二

岱山饒靈異范雲天路安可窮曹植白雲隨

玉趾沈約皓月鑒丹宮顏延之晨策尋絕壁謝靈運平

明登雲峯謝眺

下臨千仞谷

司馬彪

仰聆大壑

瀝謝靈運

兼燭八紘

內劉楨

托慕九霄中沈約

萬象咸光昭謝靈運

玉宇來清風

劉楨

其三

日觀臨東溟

顏延之

高盼渺四海

左思

襟帶盡

巖壑徐悱

崇雲臨岸駭

陸機

碑版誰聞傳謝靈

運茗茗歷千載

謝靈運

熙翰詠新賞

江淹上天

垂光彩

魏文帝

迢遞起朱樓

謝眺

天子命上宰衆據揚鑒戾

行宮謝瞻翠山方靄靄江淹

其四

欽聖若旦暮謝靈運言論準宣尼左思回軒

駐輟蓋鮑照嘉樹下成蹊阮籍叢林森如束張協樛

枝聳復低謝眺徘徊墟墓間潘岳顏閔相與期

阮籍肅肅廣殿陰江淹濟濟映光儀曹攄德禮

既晉洽顏延之

命駕起旋歸

阮籍

聖駕幸闕里恭頌

有序

國子監司業

臣

彭定求

臣聞作君兼統於作師道法實該夫治法微言

刪述功在六經大義昭垂理歸一貫洙泗開百
王之範春秋立萬世之宗我

皇上丹宸凝神細旃味道履仁蹈義優游純粹之林盡

性達天函蘊精微之府固已

淵衷風契

至德宏昭矣茲值海寓之昇平當

璇宮之清燕時巡方舉望秩初修瞻魯甸以來遊訪

孔庭而泣止登山觀海式親俎豆之容入室升

堂益慰羹牆之慕禮加崇於

先聖

恩遍及於後昆懿典備焉休風尚矣爰徵載籍代有成
規建武停鑒迄貽譏於識緯祥符駐輦終獲誚

於天書展謁雖隆闡揚未覩惟我

皇上折衷禮樂制備憲章游覽圖疇功兼述作稽古却
東封之典尊師修北面之儀心法相承直紹源
流於千載音容如覲儼然授受於一堂則倣惟
殷步趨罔間所謂臻其閭奧且以證厥津梁也
矧復狀

天章之麗揚

宸翰之輝凡屬殊榮尤稱僅事從此定百家之軌轍道

炳中天擴九有之風聲化成率土允矣斯文之
慶誠哉大道之光弇陋小儒遭逢斯盛識同窺
管何能仰贊

高深職在濡毫竊效詠歌化澤乃拜手稽首而作頌

曰

景厯貞元會

乘輿到杏壇

省方先海甸返旆自江干統接尼山武源尋泗水瀾

麟郊屯羽騎
鷺序整纓鞶
駐蹕亭凝紫
繚垣旭
繪丹晴沙
荆避路密
蔭檜凌寒
吐玉留朱
紱縱
金降

翠鑾奎門迎劍珮
享殿集衣冠
望氣祥雲擁
升輶瑞
露溥牲牢
踰漢祀
纁幣肅祠官
鐸擬周
雖振絲
聽魯壁
彈表章
師道重
妥侑

帝心安遠軼崆峒
駕真同岱嶽
觀摘詞舒

睿藻叶律和猗
蘭翰采霏瓊貝
文漪簇綺紉
行間疑舞

鳳筆底訝回鸞華蓋膺

殊錫神存喜共看傳綸

天賁寵賜爵

主恩寬盛典青編紀穹碑綠字刊小臣司俎豆歌誦託

毫端

幸魯頌有序

日講官起居注翰林院編修臣勵杜訥

康熙甲子冬十一月

皇帝命法駕詣闕里釋奠

先師禮肅九拜甚曠典也既進弟子員講書畢徧觀
車服禮器撫嘉植閱豐碑愾然遐慕彌切景行
爰

御書榜額作賦咏詩

奎畫天章之盛振古如茲洵為初見雲漢昭回廟堂增
重已復謁林展拜游覽久之乃撤

仗前曲柄繖留於廟庭

賜賚聖裔以下章服幣帛有差進講者二人授以官
異數深恩皆徃代所未有是舉也不惟東魯之父老諸
生歡聲雷動凡在列羣工薄海橫經之士仰見
聖天子篤學右文崇儒重道如此其懃拳懇摯也相率
感奮濯磨蒸蒸向風而宣聖之統緒更極昌明
已寧祗典禮煒煌昭垂奕世哉敬拜手稽首而
作頌曰

羲畫肇開弘宣至道歷禩哲人執貞蘊寶王迹

晦冥幾委蔓草崛起尼山濶迴既倒棄訓修明
功逾軒昊燄虐羸秦簧鼓佛老詩禮之堂鼓鐘
孰考在昔誼辟間枉鸞旌信道未篤祇循其名
洪維

至聖首出立極天錫亶聰古訓是式疊疊就將乾行不
息洞徹性天闡揚精一寤寐儒宗儼臨魯邑祭
菜升歌心儀至德

宸翰充庭輝炳星日圜橋駿奔湛恩洋溢洙泗增流杏

壇起色緬維隆古以君作師厥統既分我

皇一之外王內聖包舉弘規登三咸五參贊兩儀遙遙

百世文其在茲小臣載筆恭紀昌時

聖駕幸闕里頌

有序

日講官起居注翰林院編修

臣

顧

藻

益聞河圖發苞符之秘太極函闔闢之原畫啓
羲皇筴推軒后神堯之欽明峻德帝舜之濬哲
重華夏鼎商盤文謨武烈靡不綜該一貫於以

統攝萬幾至若集帝與王而大成會性與學而立教恢中天之運則日月相昭垂億萬之傳則乾坤以位實由

宣聖夫子至道斯存焉而自漢唐以還英主亦懋崇儒之蹟宋元而降太常僅申釋菜之文黌宮之類壁藻采雖華闕里之庭階蘚痕或剝洪惟我皇上性本天知文思天縱聿昭英武海寰悉慶平成右尚鴻文山瀝胥歸胞與致垂衣之治既老安而

少懷陳典學之規更中和而位育挈千聖百王
之緒總匯神明扶五經六藝之微咸歸陶鑄誠
聖敬日躋而王風丕著矣乃猶羹牆屬望所紹述乎心
師以至劍履遺踪必步趨乎聖域爰

命觀禮式叶健行陟曲阜之故堂

鸞旂戾止布杏壇之廣席

鳳蓋遲留大禮尊師

命舞干而合樂中心為道

躬致拜以薦歆當年之車服禮器宛挹遺徽此日之易
象春秋大宣精義

詔諸生以鼓篋進博士而橫經講席前敷識聖謨之浩
大園橋聽集喜

天語之炳烺于焉

駐蹕孔林

停輿川上源泉混若干百載不啻親承古道依然前
後聖總靡殊指用灑

天章特標

宸采詔羣倫之師表留終古之碑題玉振金聲數仞之
宮牆愈臻輪奐天經地義萬年之俎豆益著光
華斯固生民含戴以來曠典特殊之盛者也臣
幸遭

神聖親際休明敢持蠡測之愚聊紀斑窺之實謹拜手
稽首而獻頌曰

貞元會啓景運遐昌顯謨駿烈毓祉凝祥握乾

御坤於致垂裳道統惟聖建極惟

皇敦敏徇齊蘊隆玉翕堯安舜協厥中允執于聖淵源

兼綜竝立廣運惟神文敷武輯

聖學日懋

聖心日恭乃咨典禮乃訪秩宗蠲吉諏時

省方於東既望于岱覃御六龍霓旌歲蕤虹旄旂旒
詣于杏壇遵于闕里奕奕防山悠悠泗水拱翠含清

呈奇效美端門戾止

降輅肅趨敬躋聖室歆格用孚既盥既薦奠瓚既俱
雞彝龍勺琮璧盤盂四氏贊幣博士迎牲奏以
金石合以韶頀天開日舒欣豫
皇情默契靈泉憑弔佳城還

御講堂陳經聞義鼓吹三墳笙簧六藝聖謨洋洋發
幽啓秘載沛

殊恩大被世裔羹牆在念猶未釋然

龍章親製壽彼貞珉挾藻宣華炳炳麟麟奎光璧采榮

燭高旻呼嵩旋繞歡洽神人於爍我

皇維清熙緝作君作師上律下襲

聖德神功參三屹立小臣颺言拜稽悚慄

皇帝釋奠於闕里詩

有序

日講官起居注翰林院修撰

臣

蔡升元

蓋聞羲畫禹疇遠開道統洙源泗水直接心傳
唯聖人為百世之師若

孔子則生民未有運丁百六身固危於當時業授三

千道實亨於奕禩是以漢高過魯祭用太牢孔
吉紹殷封延苗裔越考延光之歲祀徧諸賢載
稽廣順之年分頒御器開元則詩裁五字至道
則書布六經列戟八雙詔增門外御香一合留
置廟中然而史載尊師唯遣羣工攝事代誇重
道止聞再拜登堂惟我

皇上紹精一之傳建中和之極
聖本天縱尚集笙璫珠典之奇

德協大成還羅甲觀酉山之秘輯車書於四表同軌同
文訖聲教於萬方是行是訓爾迺一元開泰
六御乘乾當歲在於闕逢正日躔夫析木

翠華南指河嶽效靈

鸞馭東回海天徧德乃於

省方巡岳之日獨勵崇儒講學之風謂前此景道岸
於千尋久矣瞻尼望魯今且見宮牆於數仞豈
徒釋菜臨雍於是

駐輦升堂宮懸非舊陳牲獻爵俎豆維新屈

萬乘之尊師臣者帝折

九重之節為道而卑秩典既成講堂斯

御啓圖書於魯壁聖經可佐治平集觀聽於園橋周

易實參理數既乃流觀邃宇遐矚高墳源遠流

長井華不改本深木茂檜幹依然特賁

天章森成

奎畫五言賦就吟來寶玉琳琅八體書工望去慶雲紉

縵且也華芝繡織

賜撤伏前曲蓋流蘇香飄座右家蒙爵賞羣依

天子之光邑免租庸共沐

聖人之澤擴幽宮之邊幅永斷樵蘇設守廟之官司常
供灑掃肇弘模於不世軼隆古而無前陋彼曩
規徒借觀兵而登曲阜遠踰方策豈因封岱以
過稷門至治馨香斯文佑啓洎乎

回鑒告止端拱凝神

聽政餘閒齊居思道濡帝鴻之硯文構豐碑揮秋兔
之毫書懸芝榜鸞停鵠峙縱橫於

駐蹕亭邊綠字赤文焜耀於杏壇門外唯

君道克光師道斯

王言允叶聖言況乎祀秩元公遽及於顏曾思孟
思推

至聖不遺夫濂洛關閩休哉道洽化成允矣禮明樂
備臣智同測蠡技比雕蟲

豹尾隨車有懷扈從

螭頭載筆願效賡歌敬獻巴詞敢揚盛事

岱郊成禮不封巒問俗江淮雨露寬東望泮林
連矍相南來車騎

勅祠官衢通五父循牆入

詔許諸生夾道看知是

王心恒主敬稷門乍到便停鑾

其二

判架軒懸設兩隅

親紆玉趾杏壇趨千秋重器元和在

九拜新儀廣順殊禮殿

奎章先後降講堂經術治平須更留曲瑤分

仙仗盛事從稽舊典無

其三

洙水橋迴輦路存大庭雲物接松門欖檀樹底
林無刺瓠甌祠前鳥不喧井稅新蠲今歲賦墓

田重拓舊時原自封黃玉千年後未見優崇若
至尊

其四

銀榜高題萬世師更礪燕石輦豐碑儒林還錄
周公後祀典兼修孟子祠檜樹清芬敷

睿藻川流今古契心期微時螭陛簪毫侍喜覩書成道
統垂

幸魯盛典卷二十五